

**Talamdan sa  
Mga Mensahe alang sa Full-time Training  
sa Fall Term sa 2025**

-----

**LINANGKOB NGA HISGOTANAN:  
ANG MAHINUNG DANONG MGA PUNTO SA KAMATUORAN SA MGA SULAT NI PABLO—  
FILIPOS UG COLOSAS**

**Mensahe 2**

**Mausa sa Kalag aron Makapahimulos ni Cristo  
sa Paghunahuna sa Usa ka Butang,  
sa Pagkausa kang Cristo sa Mga Bahin Niya sa Sulod,  
ug sa Pagpabuhat sa Dios sa Sulod Nato sa Pagbuot ug sa Pagbuhat alang sa Iyang Gikahimut-an**

Basahong Kasulatan: Fil. 1:4, 8, 18, 25, 27; 2:2, 12-13, 17-18, 28-29; 3:1; 4:1, 4, 10, 15-16

- I. Sa hugot nga pagkasulti, dili lang basahon sa pagsinati kang Cristo ang Filipos kondili sa pagpahimulos sab kang Cristo; labi gyong naa sa atong espiritu ang pagsinati kang Cristo, apan naa sa atong kalag (sa atong salabotan, pagbati, ug pagbuot) ang pagpahimulos kang Cristo:**
- A. Kay kalabot man sa pagsinati ug pagpahimulos kang Cristo ang Filipos, nga mosangpot sa kalipay, basahon kini nga napuno sa kalipay ug pagkalipay—1:4, 18, 25; 2:2, 17-18, 28-29; 3:1; 4:1, 4.
  - B. Nakig-ambitay ang mga balaan sa Filipos ngadto sa ebanghelyo, nisalmot sa pagpauswag sa ebanghelyo pinaagi sa pagpangalagad ni apostol Pablo; naglakip kining pagsalmota sa pag-amot nilag salapi alang sa apostol—vv. 10, 15-16:
    - 1. Ang kinabuhing nagsinati ni Cristo ug nagpahimulos ni Cristo kinabuhing nagpauswag sa ebanghelyo, kinabuhing nagsangyaw sa ebanghelyo, nga dili tinagsa kondili hiniusa; labi tang makig-ambitay sa pagpauswag sa ebanghelyo, labi sab nga Cristo ang masinati ug mapahimuslan nato; mopatay kini sa atong kaugalingon, ambisyon, gusto, ug pagpili.
    - 2. Mamulong ba ta o maghilom ra, pagsangyaw gyod unta nato ni Cristo ang atong kinabuhi, pagkinabuhi, pagkatawo, ug tibuok natong persona—1:20; 4:22; itandi sa 2 Cor. 3:3.
  - C. Gisugo ta ni Pablo nga maggawi “nga angay gyod sa ebanghelyo ni Cristo,” nga mao ang “[lig-ong pagbarog] sa usa ka espiritu, usang kalag nga niduyog sa pakigbisog uban sa pagtuo sa ebanghelyo”—Fil. 1:27:
    - 1. Ang mausag kalag ug masamag-kalag alang sa buhat sa ebanghelyo mas lisod kaysa mausa sa espiritu aron makasinati ni Cristo; igsoon si Timoteo nga samag-kalag ni apostol Pablo—2:19-21, itandi sa v. 30.
    - 2. Nagkinahanglan ang pagkausag kalag nga human ta ipanganak pag-usab diha sa atong espiritu, mopadayon pa gyod ta ug magpatransporma sa atong kalag—2 Cor. 3:18; Rom. 12:2.
    - 3. Kon wala ta mausa sa atong mga pagbati, mga hunahuna, ug mga desisyon, wala ta mausag kalag; basta wala ta mausa sa kalag, wala ta sa pakig-ambitay ngadto sa pagpauswag sa ebanghelyo, ug dili angay sa ebanghelyo ang atong paggawi.
    - 4. Kon nausa sa espiritu ug nausag kalag ang tanang bahin sa iglesia, makapatuo, makapasakop, ug makapadani kining pagkausaha, ug makasinati ug makapahimulos ta ni Cristo.
  - D. Posible mang makasinati ta ni Cristo nga wala makapahimulos ni Cristo; naa sa atong kalag ang problema dinhi—sa atong salabotan, pagbati, ug pagbuot; sama sa mga batang gipakaon nga wala makapahimulos sa ilang pagkaon, daghang panahon nga nakasinati ta ni Cristo nga wala makapahimulos Niya.
- II. Aron mausa ta sa kalag, maghunahuna gyod ta sa usa ka butang: ang *usa ka butang* sa Filipos nagpasabot sa subjectibong pagkaila, pagsinati, ug pagpahimulos nato ni Cristo; ang *usa ka***

**butang mao ang pagpursigir nato ni Cristo aron mabatonan, makuptan, ug mapanag-iyang nato**  
**Siya—1:20-21; 2:2, 5; 3:7-14; 4:13:**

- A. Aron makakinabuhi diha sa realidad sa Lawas ni Cristo, magpahimulos gyod ta ni Cristo sa paghigugma nato Niya sa hilabihan gyod, ug aron mahigugma ta Niya, luwason gyod ang atong mga hunahuna sa pagkatig-a (2 Cor. 3:14), pagkabuta (4:4), pagkamasupakon (10:4-5), ug pagkadaot (11:2-3).
- B. Ipunting gyod ang atong panghunahuna sa labaw nga pagkamaayo sa pagkaila, pagsinati ug pagpahimulos kang Cristo; ang pagtagad og laing butang makapalahi man sa atong panghunahuna, ug tungod niana makamugnag mga panagsumpaki sa atong taliwala—1 Cor. 1:10; Fil. 3:8-9, 15; 4:2.
- C. Ang usa ka butang, ang bugtong-talagsaong butang, diha sa pahiuli sa Ginoo mao ang walay kataposang pamatigayon sa Dios nga si Cristo ang sento ug uniberso—1 Tim. 1:3-4; Col. 3:10-11.
- D. Ang sulod sa walay kataposang pamatigayon sa Dios mao si Cristo; sa pagkatinuod, si Cristo mismo diha sa hingpit nga pagpangalagad Niya sa tulo ka hugna mao ang diosnong pamatigayon (Juan 1:14; 1 Cor. 15:45b; Bug. 1:4; 3:1; 4:5; 5:6); tinguha sa Dios nga makabaton og pahiuli nga lunsay ug hingpit gyong iya sa persona ni Cristo (Col. 1:17b, 18b; 2 Cor. 12:2a; 2:10; 3:3).
- E. Diha sa mga taga-Filipos naay panagsumpaki sa ilang panghunahuna (Fil. 4:2), nga nakasamok sa apostol; busa, gihangyo niya sila nga maghunahuna sa samang butang, bisan sa usa ka butang, aron mahingpit nila ang iyang kalipay (2:2):
  - 1. Ang paghunahuna og butang gawas sa usa ka butang pagsupil man nato sa pamatigayon sa Dios; ang pamatigayon sa Dios mao nga maghunahuna ta sa usa ka butang; diha sa iglesiahanong kinabuhi tabangan gyod nato ang mga balaan nga maghunahuna sa usa ka butang; ipunting gyod ang atong mga hunahuna sa pagpahimulos kang Cristo ug pun-on sa pagpahimulos Kaniya alang sa iglesiahanong kinabuhi, sa kinabuhi sa Lawas.
  - 2. Nagkalainlain ang gidak-on sa paghigugma sa mga magtutuo sa Filipos tungod sa nagkasumpaking panghunahuna nila (v. 2); dili managsama ang paghigugma nila sa tanang balaan nga mag-amping unta sa pagkausa; kon nadumalahan ug nabatokan pa ang paghigugma nato sa mga balaan, nan, makapahimulos ta ni Cristo sa paghigugma nato kanila.
  - 3. Ang pagkausa sa kalag, pagkadugtong sa kalag, dili lang aron makasinati ta ni Cristo kondili labi pa gyod aron makapahimulos ta Niya; aron makapahimulos ta ni Cristo, kinahanglang naa tay hustong kalag, “masigka-kalag” nga nausa sa kalag sa ubang balaan.

**III. Aron mausa ta sa kalag, kinahanglang mausa ta ni Cristo sa Iyang “mga bahin sa sulod,” nga nagtimaan sa Iyang mga pagbati ug sa Iyang pagbati sa sulod ug malumong kaluoy—1:8:**

- A. Ingon nga tawo, ang mga kasinatian ni Cristo sa Iyang mga bahin sa sulod naglakip sa gugma, tinguha, gikahimut-an, ug pagbati Niya—Sal. 16:3, 7 (basaha ang mga nota sa Hubad Pahiuli).
- B. Wala magkinabuhi si Pablo diha sa iyang natural nga pagkatawo sa sulod; nagkinabuhi siya diha sa mga bahin sa sulod ni Cristo; kon buot ta nga maanaa ni Cristo sa kasinatian, kinahanglang maanaa ta sa mga bahin Niya sa sulod, sa malumo ug dali-ra-matandog nga mga pagbati Niya—Col. 3:12.
- C. Sa basahon sa Filemon duna tay hulagway sa kinabuhi sa Lawas nga gikinabuhi diha sa mga bahin sa sulod ni Cristo Jesus—vv. 7, 10-12, 20:
  - 1. Sa naa sa bilanggoan sa Roma si Onesimo uban ni Pablo, naluwas siya pinaagi ni Pablo, nga nagngalan niya nga “akong anak, nga gipanganak nako sa akong mga gapos”—v. 10.
  - 2. Sa gipadalag balik ni Pablo si Onesimo uban sa iyang Sulat alang ni Filemon, niingon si Pablo nga, “Ako siyang [Onesimo] gipadala pagbalik kanimo—siya, sa ato pa, ang ako gyong kasingkasing”—v. 12.
  - 3. Nikuyog ni Onesimo ang sulodnong pagbati ug mga puangod ni Pablo sa pag-adto niya ni Filemon; ang mga pulong *ako gyong kasingkasing* sa linetra sama ra sa *mga bahin sa sulod* sa Filipos 1:8, nga nagtimaan og pagbati sa sulod, kalumo sa kasingkasing, ug mga puangod—Col. 3:12.

- D. Nagkinabuhi si Pablo diha sa realidad sa Lawas ni Cristo sa paghimo niya sa pagbati ni Cristo nga kaugalingong pagbati niya; ang pagbati ni Cristo alang sa Lawas nahimong pagbati niya alang sa Lawas; labi gyong gikinahanglan kini alang sa pagkinabuhi nato sa kinabuhi sa Lawas—2 Cor. 12:15.
- E. Kon dumilian nato ang atong kaugalingon ug makig-usa ta sa Lawas, dili gyod ta mabulag o maputol sa Lawas; ang kinabuhing ikinabuhi nato hingpit gyod nga kinabuhi sa Lawas, ug mabatonan sa Ginoo ang pagpadayag sa Iyang Lawas dinhi sa yuta karon—Mat. 16:24; Efe. 4:16.
- F. Labi tang magkinabuhi diha sa mga bahin sa sulod ni Cristo Jesus, maglabi sab ang pagbati nato sa Lawas ni Cristo ug mas mokusog ang pagbati nato alang sa Lawas ni Cristo—1 Cor. 12:26-27; Rom. 12:15.

**IV. Aron mausa ta sa kalag, buhaton gyod nato ang atong kaugalingong kaluwasan sa pagbulig nato sa Dios nga nagpalagsik sa sulod, nga nagbuhat sa sulod nato sa “pagbuot ug sa pagbuhat alang sa Iyang gikahimut-an”—Fil. 2:12-13:**

- A. Nagbuhat ta sa atong kaugalingong kaluwasan kay nagbuhat man ang Dios sa sulod nato; moingon tingali ta nga wala man tay pagbuot, apan gibuhat sa Dios ang pagbuot nganhi nato aron mabuhat ang Iyang gikahimut-an; naa sa sulod ang pagbuot, ug naa sa gawas ang pagbuhat.
- B. Gamiton gyod nato ang atong espiritu uban sa napasakop ug nabanhaw nga pagbuot nato aron mopili ta nga mobuhat sa atong kaugalingong kaluwasan sa pagbulig nato sa nagpuyo-sa-sulod nga Tulo-usang Dios, nga nagbuhat sa atong sulod sa pagbuot alang sa Iyang gikahimut-an.
- C. Ang natranspormang pagbuot nato makita sa hulagway sa Awit sa Mga Awit 4:4; niingon kining versiculoha nga ang liog sa mahigugmaong nagtinguha sa Ginoo “sama sa tore ni David, / Nga gitukod alang sa tipiganan sa mga hinagiban: / Gipamitay niini ang usa ka libo ka kalasag, / Ang tanang taming sa gamhanang mga tawo”:
  - 1. Naghisgot ang Biblia niadtong naggawi uyon sa ilang kaugalingong-pagbuot, nga gahig-ulo ug mapagarbohon, nga mga tikig og liog (Isa. 3:16); busa, nagpasabot sa pagbuot sa tawo ang liog; giisip sa Ginoo nga ang pagpasakop sa pagbuot sa tawo mao ang labing matahom nga butang diha sa tawo.
  - 2. Ang liog nga samag tore nagtimaan nga gilig-on na sa Dios ang pagbuot sa matinguhaon hangtod nga wala na siya mahigugma sa kalibotan ug wala na maepektuhi ni Satanas; hingpit nang napasakop ni David (nga nagtimaan ni Cristo) ang iyang pagbuot, ug nabihag na kini ni Cristo.
  - 3. Ang tipiganan sa mga hinagiban nga naa sa tore nagtimaan sa kadaogan ni Cristo aron maampingan ang pagbuot sa mga magtutuo sa pag-ilog sa kaaway; alang sa pagpanalipod ang mga kalasag ug mga taming; ug nagpasabot og kusog ang gamhanang mga tawo.
  - 4. Sa lakbit-asoy, gipakita sa Awit sa Mga Awit 4:4 nga gustong magpasakop sa pagbuot ni Cristo ang magtutuo, ug sama kalig-on sa tore ang iyang pagbuot nga motuman sa Iyang pagbuot; mabinantayon siya kanunay ug dili niya ipailog sa kaaway ang iyang mapasakopong pagbuot.
- D. Ang pagsinati nato ni Cristo nga atong kinabuhi sa pagsugot aron makabuhat ta sa atong kaugalingong kaluwasan makita sa hulagway sa arka nga gitukod ni Noe; ang pagtukod sa arka pagtukod man sa praktikal ug naa-karon nga Cristo nga kaluwasan sa Dios sa pagsinati nato aron matukod ang Lawas ni Cristo nga hiniusang Cristo alang sa gikahimut-an sa Dios—Fil. 2:8, 12-13:
  - 1. Hulagway ni Cristo ang arka, dili lang sa tinagsang Cristo kondili sa hiniusang Cristo sab, sa iglesia, nga mao ang Lawas ni Cristo ug ang bag-ong tawo—Gen. 6:14; 1 Cor. 12:12; Efe. 2:15-16; Col. 3:10-11.
  - 2. Sa pagtukod ug pagsulod ni Noe sa arka, dili lang nga naluwas siya sa paghukom sa Dios sa daotang kaliwatan pinaagi sa lunop, kondili nagahin sab siya gikan niadtong kaliwatana ug nakasulod sa bag-ong panahon—Gen. 8:13-19; 1 Ped. 3:20.
  - 3. Maingon man sab, sa pagtukod nato sa iglesia ug pagsulod nato sa iglesiahonong kinabuhi pinaagi sa pagtukod sa praktikal ug naa-karon nga Cristo nga kaluwasan sa Dios sa atong kasinatian, maluwas ta sa paghukom sa Dios sa daotang kaliwatan karon pinaagi sa dakong

kasakitan (Mat. 24:37-39; Luc. 17:26-27; 1 Tes. 5:3); magahin gikan nianang kaliwatana (Luc. 21:36; Bug. 3:10); ug makasulod sa bag-ong panahon, sa panahon sa millennium.